

# DI SAIT VO LUSÉRN

APPUNTAMENTO DELLA MINORANZA CIMBRA DI LUSERNA


## DI MAURN REN, 'Z IZ GENÜMMA LÜSNEN

**B**aiz 'z lacht, baiz di khnottn, baiz dar bege, baiz pitt khalch di häuser. A baizez länt untar an plam hümbel, a baizez länt untar dar hitz von höbiat; a länt vo mer? A länt von sud? Nò a länt vo pèrge pinn häuser alle baiz. Balda di dokhturen von Dianst vor di Kultür vodar Provintz vo Tria iz khent da earst bötta atz Lusérn zo süacha nà in stuaplatt, di bintsche boda da no soin, ombromm atz Lusérn mearar baz atz ändre saitn dise plattn soin khent alle umgedjukht un bograbet, hattze gebetart di oang balse hatt gesek bia 'z soinda gemacht di altn maltn von häuser von länt. «Ditza iz bol eppaz!». Hattze khött, «Asò baz hänez gesek bintsche vert un lai in zerte waltn khirchla, i moch kheam bidar zo bizzasan eppaz mearar». In sell tag hänze gevüart ditza baibe ummar pa etzan un pa bisan nà in altn stuaplatt, von maltn habar nemär geredet, ma mearar baz a bötta in di zait pinnemar gevorst: baz mai bartada soin vo asò bichte in alte

malt n halbe abegevallt? Disan summar rüaftme bidar à disa dokhtoren: «Andrea gedenkhstode vo miar?». «Ja schar». «I pin drà zo schraiba an li-bar afna khirchle in Primiero boda hatt di geläichegen malt n boda soin atz Lusérn, ma da hãm schiar tausankh djar...». «Beh di selln vo Lusérn mangara hãm bintsche mearar baz hundart...». «Ja i boazez bol, ma da soin geläich». Asò umman vo disan schümmen summartage pinneme gevuntet ummar pa länt pittman baibe boda hatt geschauget à di maurn von häuser pittar lente, «Sisto sisto, schauge da, un sèmm, schauge sèmm...». «Baz soinz alora dise malt n?». «Beh dise soinz nèt malt n pitt khalch un sânt, azpe alle di malt n von pèrgn, sânt izta drinn schiar khummadar a pizze eorde sem, ditza iz garäde daz sell boda iz gevuntart balsa hãm auzgekhocht in khälch, di khnottn boda nèt soin zörgant un allz daz buschizzate boda hintar iz gestânt hämsaz nèt vortgejukht, ma da hãm genützt zo smaltära di

maurn auzzellt. Sisto da soinda töckla kholl, da insinamài a glass un da töckla kikkarla, da hãm allz dringemalt. Pensär ke disa tèknik hänese gevuntet lai da un, azpededar hãn sa gehatt khött, in uralte maurn vo vor tausankh djar, aft di selln maurn hämsa smaltärt pinn hent, ma darchent no di vingar». «Beh schar nèt atz Lusérn, da barntnsa bol hãm genützt fratätz un katzöla». «Pisto schar? Schar schar?». «Eh billo nèt!». Di dokhturen iz gânt vür zo schauga pitt soinar lente, zo macha fotografian, zo mëzza un zo schraiba, dena hattzemar gezoaget an punkt au nà in tubo: «Un baz iz alora daz sell boda iz sèmm?». «A hänt! Dar stämp vonar hänt!». «Un sèmm baz sisto?». «Ma darchent di vingar boda hãm geslechtart di malt. Di hent, da hãm smaltärt pinn hent!». Ja, ombromm soinate dar khälch voll alla darsört, azza hebatn genützt di katzöla un gezoaget pinn fratätz beratze nägezoget aliz. Lusérn iz ditza o.

**Istituto Cimbro  
Kulturinstitut Lusérn**  
Tel. 0464-78.96.45  
info@kil.lusern.it  
www.lusern.it




## DAR KHLUMMA PRINTZ GELEST VO PAPA FRANCESCO IN DA ZIMBRISCHZUNG



**I**n an røasle mochtest stian a bötta nãmp un dõpo haltnz gearn, dise soin di zboa türm vodar "scienza della carezza". Machen kara, haltz gearn. Erãndre bartet soin di artidjé von tage vo disevür. Hatt lust zo soina schümma in allz da sell bodar tüat. Un bnda selbart bartet bokhènnen Gottarhear, bartetar khemmen hergevãnk vodar gebãrot, zo hõarase khlumma, un nèt augeplast; ditza iz eppaz vo goldraz. Benda di zait iz verte, un leng 'z lem afti bage, "vorstaz", biavl zait salbar gestãnt pittn Gott, gepetet, adorãrten? Schaffan, gèlt, un hõarme groaz machan nèt raich 'z mentsch. Ditza gelima venntmaz in di stõrdja vodar znichtn regina Atalia; 7 djarad zo schaffa un dõpo izze khentn getõatet. Azpe sa khõn di vetar von desèrt, haltne guat iz a kriage bodadar vort trakk di gebãrot. Berda bramãrt zo haba vil gèlt macht khemmen emar di ändarn. Di raichan mochan helvan in armen. Aftn planét von K.P. izta gest a trunkhatar, (a drogãratar, a sũntar), bar mochan petn vor se, azza mang khõn "ja" in lem, rekhen a hänt du o. Dar prodjèkt von Gott iz zo õlanaz pitt dignità un libe. Benn bar viazãm, movãrmaz, bokhènnen, khennen, mõchpar soin an oftega khirch, azta di apostole beratn gestãnt inngespèrt in tschenãcolo he-

batsna nèt getrakk frukte. Alle di laüt soin a khlummaz sachan aftn VII planét, boda dar Gott haltet gearm. Un bnda dar velèn von burm khinnt durchgetrakk von mauul un vodar zung, un 'z bort tõatet. Dar Gott gittar an antidoto kontro disan velèn, zo pezzrade, zo lega aftn rächt bege di karovãna von famildje: soi miserìcordia. Un in da tunkl nacht bendo pist traure lazze gian pinn petle in di hent vodar Madonna, ke 'z iz soi muatar un d' unsar o. Nãmp imen pisto benn du stãiget au afnan pèrge, sèmm dar Mosè un dar Elia hãnnen geredet. Dar hattaz zornit zo binta fra usãndre, un lazztaz frei. Soin tschelle iz a vestar hërta offe bodase bart nia spèrrn. In di famildje o bnda abas dar zorn iz verte, nützt dise drã bõrtar: "Vorgèll'z Gott, vorzãime, mage khemmen vürsnen". Bar mochan leng panãdar dunge pitt responsabilitã boda arbatn in politika, vor di ekonomia, vor alle di laüt. Allz boda loaft kartza bahèmmè, di aute di arõpl, dar internet. Furse habar mãngl vònanan disperãratn zait zo giana lese-gã, zo kalãmãranz, zo tüana eppaz ãna zo vorsa nicht in khunt. In di stille lüsan in Haillge Gaist. Ja, ombromm dar mann iz a pèttlar durch in desèrt von lem, un hatt durst vo bazzar boda Gottarhear leart abe in unsarne hertzar. A bazzar bodadar bart machan bèksln in bege. Bar khõnaz selbart alle tage, halt hert, a pèssle hërta vürsnen, ditza billt soin gemunt sperãm, hãm pazienza asò barstodar salvãm 'z lem, di earstn kristiè zo vërba di sperãntza hãm gemalt an ãncora ãgehenk vorda ãndar bèlt. Gesù gekrauzetge iz augestãnt disa iz da "naüge novella". Bar soin azpe di Draì Khõnig. Daz sell bodar nèt khemmen, daz sell bobar nèt mang khõn auz vo innzalt iz 'z bort vo Gottarhear, in sèmm lirnbar zo venna daz tiaf vo alle di tage in di boricht. Korp un seal pittn soi Gott.

AVM



LUSERNA (Trento) m. 1333


## LESAN UN LÜSNEN

**L**esan au stõrdje in khindar, iz daz peste zoa azta di khindar nemparnse in libadar. 'Z helften lirn naüge bõrtar. 'Z lirn lüsnen nèt lai bazza hõarn pittn oarn ma bazza hõarn pittn hertz o. A khinn boda lüsant a groazez boden aulest a stõrdja, hõartze nempar un boazt ke, da sell zait, iz gânt vor iz. Dise un vil ändre guate sachandar boda prink 'z gelesa in khindar, boazparse lai alle, asò azpe bar bizzan ke lüsnen aulesan a stõrdja, helftaz z'sega pezzar bazza vürkhint in di stõrdja selbart, sovl bibarz lebatn biar. Darzuar, lüsnen eparümmaz boda lest, gitt valór in bort, in sell bo 'z bill khõn, in klång, in sell bo 'z macht khemmen in sint.

Ditza habar pensãrt baldaz iz khent in sint zo kontãra au stõrdje azpe biar in khindar, in selln boda di zung rensè, in selln boda lai vorstian un in selln bodase njãnka nia hãm gehõart. Da earst bötta boda i, di llenia un dar Andrea soin gânt pittnãndar zo lesa azpe biar in fremmegen khindar, iz gest vert nidar ka Tria, in palãtz von Albere, aft Biblioè, dar tage von bibliotèke. Bar hãmda njãnka sovl gegloabet biar ke, khindar, ma groaze laüt o, beratnse augehaltet, anvètze soinsase propio fermãrt zo lüsna disa unsar alta zung. Dena, in di zait, soinda gest ändre treff, pitt khindar un pitt groaze. Pan summar, vennbaraz in Haus von Prück zo reda afte zung, alle di fintza

un sèmm o khemmenda hërta zuar naüge laüt. A tiabas a bötta, balda in di Bibliotèke soinda magãre a par khindar, vospãren bisa bölln azparen kontãrn a stõrdja, un se, balza rispũndar vo ja, impãtèn nèt ke di bart soin azpe biar, ma lai dõpo a par righe, soinsa sa hìgevãnk un lüsnen sovl bisa vorstianatn allz. Dar treff bodaz hatt gètt rächt zo giana vür un hattaz gemacht vorstian ke furse saibar nèt nã zo vorliara zait iz gest auz pan lestn von ludjo, balda, zo lüsna stõrdje azpe biar, soinda zuarkhent maeerar 'baz vüchtzekh khindar pittn eltam, in parkplatz vo Lusérn. Alle soin gestãnt stille un, laise laise un laise laise, soinsase gezoget nempar, zo hõara pezzar. A diãmdle, boda hatt gehatt in bisnono

vo Lusérn un boda khint zuar pittn non boda nèt ren azpe biar, balz iz gekheart bodrũmm huam, hattz khött, stoltz, in nono. "Du pist a halbar Lusérnar, ma a stõrdja augelest gânt azpe biar, hastose nia gehõart, i anvètze boll!" Da unsar alt zung, da sell bötta, iz khent di zung vo alln. Lüsnen lesan billt soin gemunt o hõarn in klång von bõrtar, lem daz sell boda dar libar kontãrt, hõarase nãmp in mentsch boda aukontãrt. Biar pensãrn ke alle dise khindar, vor an ur, soinsase gehõart a pizze di Melissa von kholar un 'z Düsele Marüsele, pittn klång vonar zung boda, vil vo se, hãm nia gehatt gehõart.



Simone aft Biblioè 2016

MNG

**TUTTE LE MOSTRE DEL CENTRO DOCUMENTAZIONE LUSERNA SONO APERTE TUTTI I GIORNI CON IL SEGUENTE ORARIO**  
agosto: 9.30-12.30 e 14-18.30; dal 1/9 al 5/11: 10-12.30 e 14-18

# DINOMITI

RETTILI FOSSILI E DINOSAURI NELLE DOLOMITI

FOSSILE REPTILIEN UND DINOSAURIERPUREN AUS DEN DOLOMITEN

STORIA GEOLOGICA DEGLI ALTIPIANI CIMBRI

ERDZEITALTER GESCHICHTE DER ZIMBRISCHEN HOCHBEENEN

Centro Documentazione Luserna

Dokumentationszentrum Lusérn

MOSTRA 2017 AUSSTELLUNG

17.4 - 5.11.2017

Luserna Lusérn

www.lusern.it

VICHAR IN DI KHNOTTN

e altre sale!